

Baluu u aye e pi omaEbele Eli na kalanu

Baluu inde u aye nani e pi omaEbele, u aye nani pi limbi omakilisito inde akolo masikpe de na'o ká nabhuka gba o bhú Kilisito ka nato mbolo li uo adu anu bha ne kalanu-o. Kpála inde aye baluu ango-o, adu ato masi bhú uo ane mane bhú nabhuka ne nasuno pi uo me, Yesu Kilisito ne polofeta na kukuu, a ko la di polofeta na soso inde li Ebhe apana lie bhú e pi okpála gba e-o.

Bhú 'ngú na Ebhe gba omaYuda-a, odimandø adu amene mayo ne natsulu onu ngubula me Ebhe mbu li siti 'ngú gba okpála. Engú inde u adu amene bhomu-o, adu kulu Yesu inde Ndili na duduma gba Ebhe, inde aha lie ngae makpe maka enu inde natsulu matsulu. Kaka-a, Ebhe a'o aní ngbéngbé ane opolofeta, ane oandjelu, ane Moidje ngae makpe, Ebhe atsia pa me a ko dimandø na duduma. Li pápá gba aní-e, ndu omabhuka hana asia mukobho li tsulu u adu ne e li pápá na siti 'ngú gba o ne li pápá na kuo.

Ongbengbe ongú inde bhú bhuku inde-e ngae inde:

Eli na kalanu: Ebhe ngasuno li e mbámhá bhú Kilisito
1:1-3

Kilisito ngbéngbé ane opolofeta, ane oandjelu, ane
Moidje, ane Djodjue, ane odimandø, ane gandja a la
di-e makiso 1:4 - 10:39

Engú na ngbéngbé a ko nabhuka 11:1 - 12:29

Nanga li Ebhe 13:1-19

Mayo na soso 13:20-21

Eli na soso 13:22-25

Yesu Kilisito ne Ndili gba Ebhe makpe

¹ Nani kalanu-o, Ebhe akpokpo 'ngú pi onguo ogbi ní bhutsibhutsi di ne li okpadji bhelé bhú 'li opolofeta. ² La bhú oekpí na soso inde-e, ani akpokpo 'ngú pi ní bhú 'li Ndili gba e inde ani a'o e ngámá pí 'ndji ndu 'he hana, di u abho nani ndu 'he hana bhú dabili bini ne e-o. ³ Ani aha bha 'Dyi e hana, kaka-a, kpála bhende au sangu gba Ndili-e au bhomu-o sangu gba Ebhe makpe. Ani abi ndu 'he hana ne 'li e na angu-o. Pita ani agbegbe okpála lie bhú siti 'ngú gba o-o, ani atsia atapa abhúlá ngú nadu li bili na ngámá li pá 'kpa na kokpa gba Ebhe Angbamili.

Ndili gba Ebhe-e ane oandjelu mane

⁴ Ndili gba Ebhe-e ane oandjelu mane, kaka Ebhe agisila 'ili li ani inde ane bhende gba uo-o mane.

⁵ Padhá de, anga Ebhe pa nga pi andjelu bini de me:

«Ngamu-o, mu ne Ndili gba ma,

naki inde-e, ma asuno 'ngú ango-o mbámá.» †

Ani pa di li 'ngú gba andjelu bini de me:

«Ma adú ne 'dyi ani,

ani tsia dú ne Ndili gba ma-o.» †

⁶ Li nedhinga li Ebhe adu natima gina Ndili gba e lie píla doto-o, ani apa me:

«A ayo me ndu oandjelu gba ma-a hana dhøø ani.†»

⁷ Ani atsia apa li 'ngú gba oandjelu-o me:

«Oandjelu gba ma-a ngamene kulu mu ma maka anvi,

u ngateteke ma maka djua inde ngatsi matsi.†»

⁸ La-a, ani atsia apa li 'ngú gba Ndili-e me:

«Mu ne Ebhe! Nau gba mu-o adú duduma ne duduma.

Mu ngau pí 'ndji okpála gba mu-o ne ngbili 'ngú .

† 1:5 1:5 Tsia bhú Ets. 2:7. † 1:5 1:5 Tsia bhú 2 Sam. 7:14.

† 1:6 1:6 Tsia bhú Det. 32:43. † 1:7 1:7 Tsia bhú Ets. 104:4.

⁹ Mu kunda ngbili 'ngú, mo oyala engú na sisiti.

Kaka-a, Ebhe gba mu-o, a'o mu kpi pi e,
ani abhu mu bhú ká obi mu,
ani atsia atuko emu na djalì pí 'ndjì mu.†»

¹⁰ Ebhe atsia apa matá me:

«Ngámá, mo obho doto nayie li lilita ngamu,
kokpí ne nganda 'kpa mu.

¹¹ Ndu 'ngú bhomu-o hana angíta mangíta, la ngamu-o,
mo otígala matigala.

Ndundu hana akádha maka bongo .

¹² Mo onúnu uo maka u anunu koti lie,
u tsia yípa di maka li bongo ayiyipa lie.

La ngamu-o, mu yiyipa de, kalanga gba mu-o ndjía la di-i
de.†»

¹³ Ebhe pa nga belegu pi andjelu bini de me:

«Ngamu-o, go du kuto li pa 'kpa ma na kokpa,
ma abú obhulu yala gba mu-o
dabili na sa 'dhu mu.†»

¹⁴ Oandjelu bha ne obua inde ngamene kulu pi Ebhe. Anì
ngatima uo me u nu nateteke okpála inde ayo me u sia
mukobho-o.

2

Mukobho inde u akpokpo 'ngú na e-e, a ko kukulu
mukobho

¹ Kaka-a, a ayo me ní gbite liní kpekpeke li kukulu
'ngú inde ní adje e-o, amba ní ambú li kpadji-e de. ² Engú
inde li Ebhe akpokpo e bhú 'li oandjelu-o , asuno lie me
a ko kukulu 'ngú. Okpála bhende i lila eli ango-o de-e,
inde agumu líli-e, u asia ke 'ngú inde ati ne uo-o. ³ La
nganí-e, ní ti da naneke ke 'ngú-o lele pi, i du me ní nde

† 1:9 1:9 Tsia bhú Ets. 45:7-8. † 1:12 1:12 Tsia bhú Ets. 102:26,
28. † 1:13 1:13 Tsia bhú Ets. 110:1.

'o 'to ní 'to kukulu mukobho-o de-e? Ngámá ngae makpe akpokpo 'ngú na mukobho ango-o kalanu ngae. Pipita-a, okpála bhende adje-e atsia apa pi ní me a ko kukulu 'ngú. ⁴ Abhomu-o, Ebhe atsia asuno me engú u akpokpo e-e, a ko kukulu 'ngú ne ongú na ngangamba, di ne ndu okiaka 'ngú hana. Ebhe apana ongú ango-o bhú naha Bu Bhobua maka ani akunda lie-o.

Yesu akpi ngubula nakobho ndu okpála hana

⁵ Ebhe ha angu pi oandjelu ngú nako pí doto inde ngago ya ngakpokpo 'ngú na e inde-e de. ⁶ Engú bini, bhú Bhuku gba Ebhe-e , kpála bini apa me:

«Kpála-kuti ne da, ngubula me mu bhundja engú gba ani-e?

Ndili gba kpála-kuti ne da me mo 'o 'to mu 'to ani-e?

⁷ Mo o'o nani ani sa oandjelu ngubula nedhinga bedi.

Mo otsia ato ndata na asasaua ne mazima bhú 'ndji ani.

⁸ Mo otsia a'o ndu 'he hana sa ani.†»
Ebhe a'o nani kpála-kuti ngámá pí 'ndji ndu 'he hana. A kunda napa me, ani 'o nani ehe bini de me aneke nadu sa ani-e de. La mbia inde-e, ní u de me kpála ne ngámá pí 'ndji ndu 'he hana-a de.† ⁹ Engú bini, ní ngau me Yesu adu nani sa oandjelu ngubula nedhinga bedi, amba ka bádha bhú 'bu gba Ebhe-e , ani ti da nakpi pi ndu okpála hana. Ní ngau mbia inde-e me, ani adyi ndata na asasaua ne mazima, anga ani asia nani likabhu bhú nakpi ka e. ¹⁰ Padhá de, anga Ebhe abho ndu 'he hana ngae, ndu 'he hana la di ne naani. Ani akunda me ongisi gba ni-e bhelé sia di sangu gba ni-o. I nde lie me Yesu Kilisito ngasuno kpadji na mukobho pi uo ngae, a ayo nani me ani du bedhe hana li kpadji nazu likabhu.

† 2:8 2:8 Tsia bhú Ets. 8:5-7. † 2:8 2:8 Tsia bhú Ets. 8:5-7.

¹¹ Yesu ngagbegbe okpála bhú siti 'ngú gba o-o ngae. La di-e, 'dyi ndu okpála hana inde ani agbegbe o bhú siti 'ngú-o bha bini. Kaka-a, numu li ani ade ngú na'i uo me ondaise ni. ¹² Ani apa pi Ebhe me:

«Ho Ebhe! Ma apa engú gba mu-o pi ondaise ma.

Ma atóko mu kala ndu okpála hana.†»

¹³ Ani apa di me:

«Ma a'ó nabhuka gba ma-a bhú Ebhe†.»

La di me:

«Tsia ya bhú dabili bini ne ongisi inde li Ebhe aha o muma-o.†»

¹⁴ La di-e, ongisi gba Ebhe-e, a ko okpála-kuti inde bhú kute, a la di bhú uo ne ngute. Yesu ngae makpe akolo bhadi maka uo, ani asia di kute ne ngute maka uo. Abhomu-o, bhú nakpi ka ani-e, ani atsia aha angu djabulu inde li angu na kuo nde ka e-o. ¹⁵ Yesu amene di mo-o ngubula nakobho okpála inde akolo maka obalise gba kuo bhú mukobho gba o libhomu. ¹⁶ Padhá de, anga a na paká me ani go nani nateteke oandjelu de. Engú bini, ani ago mangbo ngú nateteke piga gba Abalahama. ¹⁷ Kaka-a, a ayo nani me ani kolo bhú ndu 'ngú hana maka ondaise e, amba ani du 'ngbé dimandø . A ayo nani me ani kolo 'ngbé dimandø inde abedhe ne ndjinga, inde di ngamene kulu gba Ebhe-e li lelele, ngubula mambu na siti 'ngú gba okpála-o. ¹⁸ Mbia inde-e, ani ti da nateteke okpála inde ngali bhú nale-o, anga ngaani makpe-e, ani apu bhú nale, ani atsia azu di likabhu.

3

Yesu ane Moidje mane

† 2:12 2:12 Tsia bhú Ets. 22:23. † 2:13 2:13 Tsia bhú Isa. 8:17.

† 2:13 2:13 Tsia bhú Isa. 8:18.

¹ Kaka-a, ondaise ma omakilisito, ngayi okpála inde li Ebhe a'í o-o, yi 'o mabhundja gba yi-e pí Yesu. Padhá de, anga Ebhe atima aní ngubula me aní dú bhulu titima di ne 'ngbé dimandø gba ní-o, ní atsia abhuka la bhadi ka aní. ² Aní amene kulu kala Ebhe inde abhu aní ngú kulu ango-o ndjindji. Aní amene kulu ango-o li lelele maka li Moidje amene nani lie bhú Piga gba Ebhe-e libhomu-o.† ³ Kpála inde ayiki eti-e, sisia nadhogø nane eti inde aní ayiki e-o. A moko, a ayo me u dhogø Yesu nane Moidje mane. ⁴ Ayyiki eti hana ne kpála bini. La-a, kpála inde abho ndu 'he hana-a ne Ebhe. ⁵ Moidje ngae makpe amene nani kulu li lelele bhú Piga gba Ebhe-e libhomu. Aní adu nani kpála na kulu inde adu nakpokpo 'ngú li Ebhe adu nakunda napa e sisi-o. ⁶ Engú bini, Kilisito ne Ndili inde ngamene kulu li lelele. Aní maka nepanda li Ebhe a'o e li eti gba e-o. Eti ango-o, a ko ní, i dú me ní nde abhuka na paká paká, i dú la di me ní nde ne gindaginda li 'ngú ní nga'o 'to ní 'to e-o.

Bili naguo inde li Ebhe aleke e pi okpála inde ngamanga aní-o

⁷ Kaka-a, a maka li Bu Bhobua apa lie me:
«† dú me yi nde adje 'li Ebhe naki inde-e,

⁸ yi agbíte bua yi de,
maka yi agbe nani kpéke 'ndji lie li aní,
ekpí inde yi ale aní lie abhú mili bili-o.

⁹ Bhú 'gu oo, onguo ogbi yi ale nani ma ngubula nambila
'ndjá bua gba ma-o,
abana u au ndu 'ngú ma amene e, ngubula kalanga
ndjikpa badha lie hana-o.

¹⁰ Kaka-a, bua ma atsia ake ne uo.
Abhomu-o, ma atsia apa me:

† 3:2 3:2 Tsia bhú Nom. 12:7.

«Uo ngadjì 'ngbu o li ma ndu nedhinga hana bhú mabhundja gba o.

U mbila engú inde ma akunda e pi uo-o belegu de bini.»

¹¹ Li bua ma ake lie, ma atsia atu silika me:

«U lí li bili ma aleke e ngú naguo pi uo-o belegu de bini!†»

¹² Ondaise ma, yi lila liyi ngubula me kpála bini bhú ká yi adú ne siti bua de. Aní adú di ne bua na nabhuka de-e de, inde nga'e okpála li kpadji gba Ebhe na mukobho-o.

¹³ Aní nga'i yi ndu 'kpí hana. Ka 'ngú ango-o, li ekpí na naki inde li Bhuku ngapa 'ngú e nde nga bha ngabhue lie, yi teteke liyi sunda yi nedhinga yi ngadje e'i ango-o lie-o. † du mo-o, siti 'ngú píte yi de, kpála bini bhú ka yi yála la di namanga Ebhe de. ¹⁴ Padhá de, anga ní ne okpála gba Kilisito, † du me ní nde alila nabhuka inde ní asia nani e li lilita kpekpeke akolo ali soso-o.

¹⁵ Bhuku gba Ebhe-e apa me:

«† du me yi nde adje 'li Ebhe naki inde-e, yi agbíte bua yi de, maka yi agbe nani kpéke 'ndji lie li ani-o.†»

¹⁶ La-a, a ko okpála bhedho inde adje 'li Ebhe, atsia agbe nani kpéke 'ndji li ani-e? A ko ndu okpála hana inde li Moidje agbe o bhú Edjipeto-o. ¹⁷ La-a, Ebhe ake 'ngú lie pi oda ngubula kalanga ndjikpa badha-a? Aní ake 'ngú lie pi okpála inde amene siti 'ngú, u atsia amu abhú 'gu.

¹⁸ Ebhe atu nani silika me: «U lí li bili ma aleke e ngú naguo pi uo-o belegu de bini.†» Aní atu nani pi oda? Aní atu pi okpála inde agbe nani kpéke 'ndji li ani-o.

† 3:11 3:7-11 Tsia bhú Ets. 95:7-11. † 3:15 3:15 Tsia bhú Ets. 95:7-8. † 3:18 3:18 Tsia bhú Nom. 14:1-35; di ne bhú Ets. 95:11.

19 Ní au me, u lí nani lí bilí naguo bhomu-o de, anga u bhuka nani-i de.

4

¹ Ebhe apa nani me ní alí lí bilí naguo inde ní aleke e malí. Kaka-a, 'e-e! Yi lila liyi, amba kpála bini bhú ka yi anéke nali lí bilí ango-o de. ² Ní asia eli gba Ebhe-e bhadi maka okpála bhende adu nani abhu 'gu-o. La-a, u sia eli ango-o ne tata de. Padhá de, anga lí u adje eli ango-o lie, u sia ne nabhuka de. ³ Nganí okpála bhende abhuka-a, ní alí lí bilí naguo bhomu-o malí, lí Ebhe apa 'ngú e me:

«Lí bua ma ake lie,
ma atsia atú silika me:
«U lí lí bilí inde ma aleke e
pí uo ngú naguo belegu de bini.†»»

Abhomu-o, kulu gba ni-e atsia andjia nayie lí ani abho doto lie-o. ⁴ Padhá de, anga bhú Bhuku gba Ebhe-e , u apa pindji ekpí na mananika-a me: «Ebhe aguo bhú 'kpí na mananika, lí ani amene ndu kulu gba e lie hana-o.†»
⁵ Ebhe atsia apa matá di me: «U lí lí bilí inde ma aleke e pí uo ngú naguo belegu de bini.†»

⁶ Okpála bhende asia nani Bádha Ngali gba Ebhe-e kalanu-o, lí nani lí bilí naguo ango-o de. Padhá de, anga u ayala nani namene lílí gba Ebhe. Abhomu-o, Ebhe atsia ade kpadji pí okpála koko ngú nali lí bilí ango-o. ⁷ Kaka-a, Ebhe a'o matá ekpí koko, ekpí inde u a'i e me: «Naki inde.» Ani apa nani ngú na ekpí ango-o sidi naali bhú 'li Davidi, bhú lukuluku inde u apa 'ngú lí e kalanu-o me: «† du me yi nde adje 'li Ebhe naki inde-e,

† 4:3 4:3 Tsia bhú Ets. 95:11. † 4:4 4:4 Tsia bhú Dje. 2:2. † 4:5 4:5 Tsia bhú Ets. 95:11.

yi agbíte bua yi de.†»

⁸ Padhá de, anga i dú me Djodjue dhúku nani ne okpála li bili nago ang-o, Ebhe de pa matá 'ngú na 'kpí koko nago de. ⁹ Kaka-a, nago maka ekpí nago na mananika-a, atigala pi okpála gba Ebhe-o. ¹⁰ Padhá de, anga kpála bhende ali li bili nago inde li Ebhe aleke e, ngago li okulu gba e maka li Ebhe aguo lie li obhe gba e-o. ¹¹ Kaka-a, ní mene ne kpéke me ní li li bili nago ang-o. Ní mene me kpála bini bhú ká ní atí ka kpéke 'ndji de maka onguo ogbi ní inde adu nani ne kpéke 'ndji-e, li lie li bili ang-o de-o.

¹² Padhá de, anga eli gba Ebhe-e bhú mukobho, a la di ne angu. A dhédhé ane mbotia inde u adyi 'te e ne pasu bhisi hana. A adudu kpála, i tsia kólo makolo li bhobua ani. A ngadu kpála akólo makolo li bili li biki di ne mbilika akò lio lie-o. Eli ang-o ngasuno engú inde awo lie li bua kpála ne bhende ani ngabhundja e-o. ¹³ Ehe bini nabho mabho inde awo lie kala Ebhe-e ade. Ndu 'he hana inde ani abho e ngau lie mbámbá kala ani. La di-e, ní akpókpo ndu 'ngú gba ní-e hana kala ani.

Yesu ne 'ngbé dimandò gba Ebhe

¹⁴ Kaka-a, ní lu kpekpeke bhú nabhuka inde ní ngakpokpo 'ngú na e-o. Padhá de, anga a ka ní ne 'ngbé dimandò na angu inde anu akolo makolo abhúla kala Ebhe. A ko Yesu, Ndili gba Ebhe. ¹⁵ 'Ngbé dimandò gba ní-e ne angu ngú nadjé likabhu bhú dabili bini ne ní bhú bhuku gba ní-o. Ani ali bhú nale ne ndu kpadji hana maka ní, engú bini, ngaani-e, ani mene siti 'ngú belegu de bini. ¹⁶ Kaka-a, ní dyudyo liní de kiti na ngámá gba Ebhe-o, li bili na bádha bhú 'bu gba ani-o. Oo, ní asía

† 4:7 4:7 Tsia bhú Ets. 95:7-8.

mambu, aní tsia súnó bádha bhú 'bu gba e pí ní ngubula nateteke ní bhú nedhinga ayo lie-o.

5

¹ U bhubhu 'ngbé dimandø gba Ebhe-e bhú ká okpála ngubula me aní mene kulu gba Ebhe-e bhú ka uo. Aní tsutsulu enu maka makiso pí Ebhe ngubula siti 'ngú gba uo-o. ² 'Ngbé dimandø gba Ebhe-e ngae makpe di bhubhuku. Kaka-a, aní tí da nadjé ndjinga okpála inde lí imbilangu nde bhú 'ndjì o ade, inde di ambu lí kpadji-o. ³ Lí 'ngbé dimandø gba Ebhe-e ngae makpe nde lie bhubhuku-o, aní tsutsulu enu na makiso pí Ebhe bha bini ngubula siti 'ngú gba okpála de. Engú bini, aní tsutsulu di ngubula siti 'ngú gba e makpe. ⁴ Kpála bini tí da nato ndata na 'ngbé dimandø gba Ebhe-e bhú 'ndjì e ngae makpe de. Kpála kokolo bha 'ngbé dimandø gba Ebhe-e me Ebhe nde a'ì aní ngae, maka aní a'ì naní Alona lie-o.

⁵ A bhadi pí Kilisito moko. Aní to naní ndata na 'ngbé dimandø gba Ebhe bhú 'ndjì e ngae makpe de. Engú bini, Ebhe aha naní pí aní ngae, Ebhe atsia apa pí aní me:

«Ngamu-o, mu ne Ndìlì gba ma,

nayie pí naki inde-e, ma ne 'Dyi mu.†»

⁶ Aní atsia apa di lí bilì koko me:

«Mu ne dimandø gba ma duduma ne duduma,

maka Malekisedeke.†»

⁷ Nedhinga lí Yesu adu lie píla doto-o, aní adu nayo Ebhe di ne nakikiliki lie pí aní ne nasusula kpekpeke la di ne ngula bhú djila e. Aní ayo Ebhe inde í tí da naní nakobho aní bhú kuo-o. Abhomu-o, Ebhe atsia adje

† 5:5 5:5 Tsia bhú Ets. 2:7. † 5:6 5:6 Tsia bhú Ets. 110:4.

ani, anga ani a'o nani lie ne kuto kala Ebhe. ⁸ Abana ani adu nani lie Ndili gba Ebhe-e, ani ambila lie ne namanga Ebhe bhú likabhu inde ani azu e-o. ⁹ Pita ani andjia kulu gba e lie hana ndjindji kala Ebhe-e, ani atsia akolo kpongu na mukobho na duduma pi ndu okpála hana inde ngamanga ani-o. ¹⁰ A moko, Ebhe a'o ani 'ngbé dimandó gba e maka Malekisedeke.

A ayo me yi bhele bhú nabhuka gba yi-o

¹¹ Ya ne engú bhelé napapa pindji 'ngú bhomu-o. Engú bini, da nambamba tata-a kpekpeke, anga yi ti da nakpokpo kúkú má gala de. ¹² Yi adu nako ne nedhinga bhelé ngubula me yi kolo omusuno. Engú bini, yi matá ne gumu me u suno ongú na kalanu na eli gba Ebhe-e pi yi ne toto. Yi nga bha ne gumu nandji miliki bhú da nazu ezu na kpekpeke. ¹³ Padhá de, anga kpála bhende nga bha ngandji miliki-e ne ndili. Ani mbila nga nagbogbo bhusu bádha 'ngú ne siti 'ngú de. ¹⁴ La-a, ezu bhe na kpekpeke-e pi obhelesi okpála. A ko okpála inde ambila lio ne nagbogbo bhusu siti 'ngú di ne bádha 'ngú ka okulu inde u amene e-o.

6

¹ Kaka-a, ní kodho 'kpí li nasuno bhende ati ne obhelesi okpála-o. Ní dji 'ngbu ní li nasuno na lilita gba omakilisito. Ní a'ó matá 'dhu nasuno inde-e ne toto de: nadjia bua o di ne na'o okulu inde ngato kpála bhú kuo, ² nasuno pindji obatisimo di ne na'o 'kpa o pí 'ndji kpála, nakpokpo 'ngú pindji nazuku ka okpála inde amu, di ne nakodho 'ngú na duduma. ³ A bhomu-o ongú inde a ayo me ní 'o e-o, i du me Ebhe nde akunda-o.

⁴⁻⁶ Padhá de, anga engú gba okpála bhende ngagie lio bhú siti 'ngú gba o-o, lele pí? U asia nani zi 'ke gba Ebhe-e asia. U ale bádha 'ngú inde li Ebhe ngaha e pi omaha e pí 'mi o. U atsia asia di Bu Bhobua bhú dabili bini ne okpála koko. U ambila ndjindji me eli gba Ebhe-e babadha. U ambila angu na doto inde ngago-o. Pipita-a, u atsia a'o ká nabhuka gba o-o! U ti da matá namene de me u dji bhobua o bhútsibhútsi na bhisi-e de. Padhá de, anga u ngagie matá Ndili gba Ebhe-e li kulusi ne toto. U la di ngaka kpadji pi okpála me u dú nasobho ani.

⁷ Li doto dú nandji ngubha inde ngadhi pépé ndu nedhinga hana-a, li i dú la di me a nde ngagbe ezú pi okpála inde alu edyi angoo ndjindji-e, li Ebhe túko bisagu pí doto angoo. ⁸ La-a, i dú me doto angoo nde azu ulu na eti ne bhe na sisiti-e, tata dú tété de. Doto angoo masikpe me Ebhe tu pødjø tété. Pipita-a, u tsia bú bhú djua.

⁹ Abana ya pa mo-o, ondaise ma na mukunda, ya ambila ndjindji me yi li bádha kpadji, kpadji na mukobho. ¹⁰ Ebhe ne kpála na ngbingbili . Ani 'ili 'to e li kulu gba yi-e de. Ani 'ili la di 'to e li mukunda yi asuno e pi ani li kulu inde yi amene e, inde la di yi matá ngamene e pi omakilisito koko de. ¹¹ Gumu gba ya-a me ndu yi hana bini ne bini, yi suno ngua mukunda bhomu-o nakolo makolo ali soso, ngubula me ndu 'ngú hana inde yi nde ne 'to yi 'to e-e, tsia mene lie hana. ¹² Yi andála de. Engú bini, yi kpata nganda okpála bhende ngabhuka ne kekele, inde la di ngasia ehe inde li Ebhe apa me ni ahá e-o.

Ní 'o 'to ní 'to ehe inde li Ebhe apa me ni ahá e pi ní-o

¹³ Li Ebhe apa nani lie pi Abalahama me ni ahá ehe pi ani-e, ani apa 'ngú angoo ne natu silika ne 'li e makpe.

Ani amene mo-o, anga kpála koko inde ngebéngbé ane ani ade. ¹⁴ Ani apa nani me:

«Ma atu silika me ma atúko bisagu pí mu,
ma tsia méne me odi mu kolo bhelé.†»

¹⁵ Abalahama adjeke ne 'ndjá bua, ani atsia asia ehe inde li Ebhe apa nani me ni ahá e pi ani-o. ¹⁶ Li okpála du natu silika-a, u tutu ne 'li okpála inde ane uo mane. La di-e, natu silika ngandjia kpekebhe sunda okpála. ¹⁷ Ebhe asuno bhomu mbámbá pi okpála inde ayo me u sia ehe inde ani apa me ni ahá e-e, a anéke belegu de bini. Kaka-a, ani atsia atu silika pí 'ngú ang-o.

¹⁸ A ne ongu bhisi inde u ti da nadjia e de, a ko natu silika di ne ehe inde li Ebhe apa me ni ahá e-o. Bhú ongu bhisi ang-o, Ebhe ti da napa eu belegu de bini. Ngani okpála inde awo liní bhú Ebhe-e, ní alu kpekpeke, ní a'o la di 'to ní na paká paká 'to ehe inde ani apa me ni ahá e pi ní-o. ¹⁹ 'To ní inde ní nga'o e ang-o ngamene me ní lu kpekpeke maka kalase inde ahoholo zabu-o. 'To ní ang-o kukulu, a la di kpekpeke. A ngamene me ní gulu 'ngbé pála bongo inde ngabuku tina 'ti na bubu na 'ngbé 'ti Ebhe gba omaYuda inde abhúlá-o, amba ní kolo makolo bhú tina 'ti ang-o. ²⁰ Oo, Yesu ali nani pi ní kalanu, la di ngubula ní. Ani akolo 'ngbé dimandø gba Ebhe-e pi ní duduma ne duduma maka Malekisedeke.

7

Malekisedeke adu nani ne dimandø gba Ebhe

¹ Malekisedeke ang-o adu nani 'ngbé ngámá na Saleme, ani atsia adu di nani dimandø gba Ebhe Apí 'Kpí. Li Abalahama adu agie lie lie bhú egú inde ani agboko ongbengbe ongámási bhú e lie, Malekisedeke anu nakø

† 6:14 6:14 Tsia bhú Dje. 22:16-17.

lío ne aní, aní atsia atuko bisagu pí aní. ² Abalahama atsia aha bini bhú ká ndjikpa bhú ndu 'he hana inde aní agbulu e-e pí aní. Ta 'ilí na Malekisedeke apa ngaiza kalanu me: «'Ngbé ngámá na ngbili 'ngú .» La di-e, aní adu nani ngámá na Saleme, inde akunda napa me: «'Ngbé ngámá na guo 'ngú .» ³ U mbila 'dyi aní ne 'hi aní de. U mbila la di onguo ogbi aní de. U kpo belegu engú bini pindji ekpí u azu aní lie ne ekpí aní akpi lie de. Aní maka Ndili gba Ebhe, kulu gba aní na dimandø gba Ebhe-e duduma ne duduma.

⁴ Yi tsia nga maka li Malekisedeke nde lie ngbéngbé-o! Abalahama ogbi omatsalaele aha nani bini bhú ká ndjikpa na ndu 'he hana inde aní asia nani e bhú egú-o pí aní. ⁵ La-a, okpála na piga gba Levi-e, inde ne odimandø gba Ebhe-e, ne angu ngú nayo bini bhú ká ndjikpa na ndu 'he hana inde ka ongisi na tsalaele, maka li líli apa lie-o. A kunda napa me u ngayoyo li ondaise o makpe, inde la di ne odi Abalahama. ⁶ Malekisedeke du nani bhú piga gba Levi de. Engú bini, aní asia bini bhú ká ndjikpa sakpa Abalahama bhú ndu 'he hana inde aní agbulu e bhú 'gú-o. La di-e, Malekisedeke atuko bisagu pí Abalahama, kpála inde li Ebhe apa nani me ni ahá oehe pí e-o.

⁷ Kpekebhø belegu ade bini me kpála bhende ngatuko bisagu pí kpála-a ngbéngbé ane kpála bhende ngasia-o. ⁸ Okpála inde na piga gba Levi-e, inde ngasia bini bhú ká ndjikpa-a, a ko okpála-kuti inde amú mamu. Engú bini, pí Malekisedeke inde u aha bini bhú ká ndjikpa pí e ne kpála inde i kpikpi de, maka li Bhuku gba Ebhe-e apa lie-o. ⁹ Ngú nabu tata-a, u ti da napa me, li Abalahama aha nani bini bhú ká ndjikpa na ohe gba e lie, Levi inde li odi e ngasia bini bhú ká ndjikpa na ndu 'he hana-a, atsia aha di. ¹⁰ Padhá de, anga Levi inde u zu nga nani e de-e, adu

bhú 'bu ogbi e Abalahama, nedhinga inde u akè lio lie ne Malekisedeke-o. Bhobhomu-o asuno me Malekisedeke ane Levi mane.

¹¹ Ebhe aha nani líli pí omaɬsalaele me, u du nabhu odimandø gba ni-e bhú piga gba Levi. U adú odimandø gba Ebhe maka Alona. Engú bini, kulu na dimandø gba Ebhe bhú piga gba Levi-e tí nani da nabledhe 'bhø kulu gba Ebhe-e de. Padhá de, anga lí kulu gba uo-o tí nani da nabledhe 'bhø kulu gba Ebhe-e uu-o, u de du nani ne gumu dimandø koko maka Malekisedeke de. ¹² La di-e, lí u yipa dimandø gba Ebhe-e, a ayo bhadi me líli-e yipa. ¹³ Padhá de, anga Ngámá gba ní inde u ngakpokpo ongú inde-e pindji e-e, naae bhú piga koko kpi. Bhú piga angoo, kpála bini mene nga belegu kulu na dimandø gba Ebhe lí bíli u atsutsulu 'he lie pí Ebhe-e de. ¹⁴ Ní mbila ndjindji me Ngámá gba ní-e adu nani bhú piga gba Yuda. Piga angoo, Moidje gama 'ngú tété de, nedhinga ani agama 'ngú lie pindji odimandø gba Ebhe-o.

Yesu ne dimandø gba Ebhe maka Malekisedeke

¹⁵ Engú inde ngasuno nayipa ka dimandø la matá mbámbá-a ngae inde: dimandø koko akoto, ani maka Malekisedeke. ¹⁶ Ani kolo dimandø gba Ebhe lí lele líli gba okpála-kuti de. Ani akolo mo-o bhú angu na mukobho inde i ndjía de. ¹⁷ A maka lí Bhuku gba Ebhe-e apa lí me:

«Mu ne dimandø gba ma duduma ne duduma,
maka Malekisedeke.†»

¹⁸ Kaka-a, u atsia a'e líli na kalanu-o, anga líli angoo adu bhubhuku, tata tsia du la di tété de. ¹⁹ Padhá de, anga líli gba Moidje tí nani da namene de me okpála kolo ngbingbili kala Ebhe-e de. Engú bini, ní asia engú

† 7:17 7:17 Tsia bhú Ets. 110:4.

bini inde ane ne bádha naali, inde ní nga'o 'to ní 'to e-o. Padhá de, anga engú ang-o ngamene me ní dyudyo liní de Ebhe masikpe.

²⁰ La di-e, Ebhe atu nani silika. Engú bini, okpála koko akolo nani odimando me u nde tu silika de. ²¹ La pí Yesu-o, Ebhe atu nani silika nedhinga lí aní apa lie pí aní me: «Ngámá atu silika-a, aní djí 'lí e de:

«Mu ne dimando gba ma Ebhe Ngámá, duduma ne duduma.†»

²² Kaka-a, Yesu di ne kpála inde ngamene me ní du bhú gandja na babadha naali.

²³ Engú koko inde kpi-e ngae inde: odimando koko adu nani bhelé naali, anga kuo adu nani kpadji pí uo me u adú odimando duduma de. ²⁴ Engú bini, Yesu bhú mukobho duduma ne duduma, kulu gba aní na dimando-o tí da nandjia de. ²⁵ Kaka-a, aní tí da nakobho okpála inde ngadyudyo lío de Ebhe lí kpadji gba aní-e ngubula duduma ne duduma. Padhá de, anga aní ndu 'kpí hana bhú mukobho ngú nayo Ebhe pí uo.

²⁶ Kaka-a, Yesu ne 'ngbé dimando inde atí ne ní-o. Aní bubu, pulu 'ngú bhú aní ade, siti 'ngú la di bhú aní ade. Aní agbo bhusu e ne obhulu mugwe. Ebhe atsia a'e'e aní tsutsu abhúlá. ²⁷ Aní maka ongbengbe odimando koko ade. Aní ne gumu natsulu 'he pí Ebhe ndu 'kpí hana ngaiza ngubula siti 'ngú gba e makpe, pipita ngubula bhende gba okpála koko ade. Aní amene nani bhutsibhutsi bini má kpíkíli, lí aní aha lie lie ngae makpe-o. ²⁸ Líli gba Moidje adu nani na'o maka ongbengbe odimando lí okpála-kuti inde i du ngbingbili hana ade-o. Engú bini silika lí Ebhe atu e-e, líli-e atsia a'o maka 'ngbé dimando Ndíli inde adu ndjindji hana

† 7:21 7:21 Tsia bhú Ets. 110:4.

libhomu maka li Ebhe akunda lie, ngubula duduma ne duduma.

8

Yesu ne 'ngbé dimand gba ní-e ngae

¹ Engú na ngbéngbé bhú ká ongú inde ní ngapa e ngae inde: a bhomu-o ngua 'ngbé dimand gba Ebhe inde ka ní-o. Aní adu abhúlá li pápá na kokpa de kiti na ngámá gba Ebhe na angu na ngbéngbé-o. ² Aní ngamene kulu na 'ngbé dimand gba e bhú tina 'ti na bubu, a akunda napa me bhú 'ti ngbangbali na kukulu. Ayiki ne Ngámá, ayiki ne kpála-kuti de.

³ U bhubhu ongbengbe odimand gba Ebhe-e hana ngubula natsulu enu maka makiso pi Ebhe. Kaka-a, a ayo me adu di ka 'ngbé dimand gba ní-e ne ehe natsutsulu maka makiso pi Ebhe. ⁴ I dú nani me aní dú píla doto-o, aní de ne dimand gba Ebhe-e ade. Padhá de, anga a ne odimand gba Ebhe koko inde ngatsulu ehe maka makiso pi Ebhe maka li líli gba omaYuda apa lie-o. ⁵ Kulu inde li odimand ang-o ngamene e-e, a ko lele kulu ongú inde ngamene lie abhúlá-o. Engú ang-o viti bini ne ehe inde li Ebhe apana nani e pi Moidje-o . Li Moidje adu akunda nayiki 'ti ngbangbali lie, Ebhe apa pi aní me: «Tsia ndjindji ngubula me mu mene ndu 'ngú hana li lele bhende ma asuno e pi mu apí 'ta-o.†»

⁶ Engú bini, mbia inde-e, Yesu asia kulu inde kpi, ane bhende gba odimand koko gba Ebhe-e mane. A ko ludu sunda ní ne Ebhe bhú gandja na babadha naali. Gandja ang-o alu di pí oehe na babadha naali inde ní nga'o 'to ní 'to e-o.

† 8:5 8:5 Tsia bhú Eki. 25:40.

OmaEbele 8:7 18 OmaEbele 8:13

Ebhe apa me ni akódho gandja na mbia ne okpála gba ni

⁷ I dú nani me gandja na kalanu-o mene me okpála kolo ngbingbili kala Ebhe-e, u de yipa ne koko de. ⁸ Engú bini, li Ebhe au lie me gandja na kalanu-o du ndjindji hana de-e, ani atsia ambembe bhú 'ndji okpála gba e me:

«Ngámá apa me: oekpí akólo makolo,
li 'kpí ma akódho gandja na mbia lie
bhú dabili bini ne piga gba tsalaele di ne bhende gba Yuda-o.

⁹ A adú maka bhende ma akodho nani e ne onguo ogbi uo-o de,

li 'kpí inde ma agbe uo lie bhú doto na Edjipito-o.
Bhú gandja ya akodho e ne uo-o, u kpata líli ang-o de.
Kaka-a, ma adjí 'ngbu ma li uo, Ngámá apa mo-o.

¹⁰ Ngámá atsia apa matá me:

a bhomu-o gandja inde ma akódho e ne ongisi na tsalaele pita oekpí bhomu-o.

Ma ató olíli gba ma-a bhú imbilangbu gba uo-o.

Ma ayé olíli ang-o li bua uo.

Ma adú ne Ebhe gba uo, u tsia dú okpála gba ma.

¹¹ Kpála bini bhú ká uo dú matá ne gumu nasuno 'ngú pi ndili na kuti gba e,
di ne pi ndai e de me ani mbila ma-a de-e de.

Padhá de, anga ndu okpála hana ambíla ma,
naye li okpála na padhá nakolo makolo li okpála na kukulu.

¹² Ma ambú li ndanda 'ngú gba uo-o.

Ma abhúndja matá osisiti 'ngú gba uo-o de.†»

¹³ Li nedhinga li Ebhe ngagama 'ngú lie pindji gandja na mbia-a, ani a'o bhe na kalanu-o me akolo didili. A na

† 8:12 8:8-12 Tsia bhú Djlm. 31:31-34.

paká me, li ehe de akolo didili akolo-o, i du la di me a nde akadha-a, ehe ang-o masakpe de nangita.

9

Olíli na gandja na kalanu

¹ A adu nani bhú gandja na kalanu-o ne olíli ngú nayo Ebhe. La di-e, bilí nayo Ebhe atsia adu di píla doto. ² U ayiki nani 'ti ngbangbali bini ne tina 'ti bhúbhú bhisi. Bhú titina na kalanu-o, u a'i e me dabilí na bubu-o, u a'o misa u a'o'o tala pí e bhúbhú. U atsia a'o di misa ne mapa inde u aha e pí Ebhe-e bhúbhú. ³ Kele 'ngbé pála bongo-o, adu tina 'ti bhe u a'i e me bilí na bubu naali-o.

⁴ Li bilí ang-o, u a'o nani misa na olo inde u adu atsulu mungotsi pí e, di ne sanduku na gandja* inde u abuku nani kute e ne olo libhomu-o. Bhú sanduku ang-o, adu bhúbhú ne lusa inde u amene e li olo, mana atsia adu bhúbhú. Bhú sanduku ang-o, adu di bhúbhú ne ndula gba Alona inde agbe nani felele, a la di-e opapala teme inde li u aye nani líli na gandja-a pí e-o. ⁵ Pí sanduku ang-o, u a'o nani okulu kelube. Okelube ang-o adu asuno me Ebhe li bilí bhomu-o. Kulu zini na mbudha uo adu abuku bilí inde li 'ngbé dimandø gba Ebhe-e aha ngute maka makiso pí Ebhe lie ngú nambu li siti 'ngú gba okpála-o. La mbia inde-e, a ko nedhinga nagama 'ngú li 'ngú ang-o bini bini de.

⁶ U aleke nani bilí bhú 'ti ngbangbali ang-o me, bhú tina 'ti na kalanu, odimandø gba Ebhe-e du nali ndu 'kpí hana ngú namene kulu gba o-o. ⁷ La-a, bhú titina bhe na bhisi-e, a adu bha bini nali ne 'ngbé dimandø gba Ebhe-e ngae kpi e kpi. Sunda kalanga bini-e, ani adu nali

* 9:4 9:4 Sanduku na gandja: A ko sanduku inde u abu nani opapala teme inde u aye olíli ndjikpa gba Ebhe-e bhú e-o.

bhútsibhútsi bini. A ayo di nani me aní lí bhú dabilí bini ne ngute enu, inde aní adu aha e pí Ebhe ngubula siti 'ngú gba e, di ngubula siti 'ngú lí okpála amene e me u nde mbíla de-o. ⁸ Bu Bhobua asuno me kpadji na tina 'ti bhe u a'í e me bílí na bubu naali bhulu nga nani líe de, í du me 'ti ngbangbalí na kalanu-o nde ngabha u-o.

⁹ 'Ti ngbangbalí ango-o ne kulu ongu inde ngamene líe bhú onedhinga inde-o. Bhobhomu-o asuno me oehe natsulu matsulu maka makiso pí Ebhe-e tí da navulu bhobua kpála inde ngamemene-e de. ¹⁰ Omakiso ango-o, a ko bha bini ongu nazu 'he, ne nandji 'he di ne ngangá mayo navulu lío ngu nakolo bubu kala Ebhe. Ndu olíli bhomu-o hana nani ne bhe gba okpála-kuti, atsia adu la bhadi ngubula nedhinga bedi nakolo lí nedhinga lí Ebhe ayípa ndu 'ngú hana líe ndjindji-o.

Kilisito agbegbe ní bhú siti 'ngú gba ní-e ne ngute e makpe

¹¹ Engú bini, Kilisito ago maka 'ngbé dimandó gba Ebhe ngubula naha obabadha 'ngú inde ngago-o. 'Ti ngbangbalí inde aní amene kulu gba e bhú e ngbéngbé naali, a la di babadha naali ane bhende na kalanu-o mane. A yiki 'ti ngbangbalí ango-o ne okpála-kuti de, a akunda napa me, a ko 'ti ngbangbalí na doto inde-e de. ¹² Kilisito alí nani bhútsibhútsi bini má kpikilí lí bílí na bubu naali ango-o. Aní ha nani ngute meme de, aní ha la di ngute ndilí bagala de. Engú bini, aní aha nani ngute e makpe. Kaka-a, aní atsia agbegbe ní bhú siti 'ngú gba ní-e duduma ne duduma.

¹³ Ngute meme, í du di-e ngute bhoko bagala di ne mbi bagala inde u atsutsulu e, u tsia bála e pí okpála bhende bubu kala Ebhe ade-e tí da namene me u kolo bubu kala aní lí pápá na kute. ¹⁴ † nde líe mo-o, ngute Kilisito ane

la matá ne angu! Aní aha lie pí Ebhe kabula Bu Bhobua na dudu~~ma~~ maka makiso inde ndjindji libhomu. Ngute aní avúlu ~~bua~~ nakpokpo kú 'ngú gba ní-e bhú ndu 'ngú hana inde ngato kpála bhú kuo-o, ngubula me ní mene kulu pí Ebhe inde bhú mukobho-o.

Kilisito ne ludu sunda ní ne Ebhe bhú gandja na mbia

¹⁵ Kaka-a, Kilisito ne ludu sunda ní ne Ebhe bhú gandja na mbia, amba okpála inde li Ebhe a'i o-o, ti da nasia babadha 'ngú na dudu~~ma~~ inde li Ebhe asuno nani e pí okpála gba e-o. U ti da nasiswa anga Kilisito akpi ngubula nagbegbe uo bhú siti 'ngú inde u amene e-o. U amene nani siti 'ngú ango-o li nedhinga u adu lie bhú gandja na kalanu-o.

¹⁶ Ní mbila ndjindji me li kpála ziba me u gbogbo bhusu ohe gba ni-e pita nakpi ka ni-e, kala me u gbogbo bhusu ohe ango-o, a ayo ngaiza me u u mbámá me kpála ango-o akpi. ¹⁷ Padhá de, anga i du me kpála inde aziba nagbogbo bhusu ohe gba e nde nga bha uu-o, tata li nagbogbo bhusu ohe inde aní aziba me u gbogbo bhusu e ade. Tata li nagbogbo bhusu ohe bha bini me kpála ango-o nde akpi. ¹⁸ Kaka-a, gandja na kalanu-o asia bha bini angu li ngute atuko lie-o.

¹⁹ Moidje atanga ngaiza nani olili kala ndu okpála hana maka u aye lie-o. Pipita-a, aní atsia aha ngute ndili bagala di ne ngute meme bhú dabili bini ne engu, aní ato ndjiga inde u agbite e ne mbe bongo bhú ngute ne engu-o. A adu ndjiga ndula inde u a'i e me idjope.† Pipita-a, aní abobolo pí bhuku na líli-o, di ne pí ndu okpála hana.

† 9:19 9:19 Idjope: A ko suka ondula na gba omaYuda. Epondje nani u ato e bhú kpongadha pandi inde u aha nani e pí Yesu me aní ndji-e, nedhinga aní adu lie li kulusi-e, u agbite nani li Idjope.

²⁰ Anì atsia apa me: «A inde-e ngute na gandja li Ebhe apa me yi manga e-o.†» ²¹ Abhomu-o, Moidje abolo di ngute-e pí 'tì ngbangbali di ne pí ndu ohe hana inde u adhødhøgø Ebhe ne e-o. ²² Maka li líli apa lie, masikpe de ndu 'he hana kokolo bubu kala Ebhe bha ka ngute. La di-e, Ebhe mbumbu bha li siti 'ngú me ngute nde atuko bha ngae.

Kilisito aha lie ngae makpe maka makiso ngú na'e siti 'ngú gba ní-o

²³ Ma apa pí yi me ndu 'ngú hana inde na kukulu li Moidje asuno nani e pí okpála-a, a ko okulu okukulu 'ngú na abhúlá. Kaka-a, a ayo la bhadi me ongú angoo kolo bubu kala Ebhe bhú ngute onu. Engú bini, ongú na kukulu na abhúlá makpe ne gumu enu natsulu matsulu inde ane ne bádha. ²⁴ Padhá de, anga Kilisito li nani bhú 'tì ngbangbali inde li okpála amene e ne kpa o-o de. 'Tì ngbangbali angoo ne kulu 'tì ngbangbali na kukulu-o. Anì alì abhúlá makpe, li bili inde anì ngagama 'ngú lie mbia inde-e kala Ebhe ngubula ní-o.

²⁵ 'Ngbé dimandø gba Ebhe gba omaYuda líli nani li bili na bubu naali-e ndu kalanga hana bhú dabili bini ne ngute 'nu. Engú bini, Kilisito li nani ngú naha lie ngae makpe bhutsibhutsi bhelé de. ²⁶ I dú nani mo-o, anì de azu likabhu bhutsibhutsi, nayie maka li Ebhe abho nani doto lie-o. Engú bini, anì akoto bhutsibhutsi bini má kpikili li nedhinga na sokpí ngú na'e siti 'ngú gba ní li kpadji naha lie ngae makpe maka makiso pí Ebhe. ²⁷ Ndu okpála-kuti hana kpikpi bha bhutsibhutsi bini. Pipita-a, li Ebhe tsia kódho 'ngú gba uo-o. ²⁸ A bhadi moko, Kilisito aha lie maka makiso bhutsibhutsi bini, ngubula na'e siti

† 9:20 9:20 Tsia bhú Eki. 24:8.

'ngú gba okpála bhelé. Aní akóto lie bhútsibhútsi na bhisi-e, a adú matá ngubula na'e siti 'ngú de. Engú bini, a adú ngubula me okpála inde ngadjeke nago ka aní-e sia mukobho.

10

Makiso gba Yesu Kilisito ane ndu omakiso na kalanu-o hana

¹ Líli gba Moidje ngasuno kukulu 'ngú hana má kpulukutu ade. A ko mangbo kulu ongu na babadha inde ngago-o. Lele pi li makiso inde li ngua e nde bha ndu 'kpi hana bini, inde u ngaha e ndu kalanga hana ti da lie namene me, okpála bhende ngadyudyo lio deno Ebhe-e kolo ndjindji kala aní-e? ² I du me okpála inde ngaha ngua makiso bhomu-o pi Ebhe-e du bubu kala aní-e, u de 'o nabhundja siti 'ngú gba o-o. U tsia 'o la di naha makiso ango-o. ³ Engú bini, naha makiso ngamene me okpála du nabhundja siti 'ngú gba o-o ndu kalanga hana. ⁴ Padhá de, anga ngute bhoko bagala ne ngute meme ti da na'e siti 'ngú belegu de bini.

⁵ Kaka-a, li Kilisito adu ago lie píla doto-o, aní apa pi Ebhe me:

«Mu kunda nani ehe natsulu matsulu,

i du di-e makiso de,

engú bini, mo oha kute mu

ngubula me ma mene kulu gba mu-o nedi.

⁶ Enu inde u atsulu e pi misa inde u atsutsulu 'he pi e,

di ne ehe natsulu matsulu koko inde

u aha e ngubula na'e siti 'ngú-o nga nani li mu de.

⁷ Abhomu-o, ma atsia apa me:

«O Ebhe! Tsitsia,

ma ngago ngama makpe

ngú namene engú inde mo okunda e-o,

maka u aye engú gba ma-a lie bhú bhuku na líli-o.†»
 8 Kilisito apa ngaíza pí Ebhe me: «Ma kúnda nani ehe natsutsulu matsulu de, i du di-e makiso de. Enu u atsulu e pí misa inde u atsutsulu ehe pí e, di ehe koko inde u atsulu e ngú na'e siti 'ngú-o nga nani lí mú de.» Engú bini, u haha makiso bhomu-o nakpata lele maka lí líli apa lie ko. 9 Pipita-a, aní atsia apa me: «Ma ngago ngama makpe ngú namene engú inde mo okúnda e-o.» Kilisito a'e omakiso na kalanu-o hana, aní atsia ayipa ne bhe gba e-o. 10 Yesu Kilisito amene múkúnda gba Ebhe-o. Aní atse kúte e ngae makpe maka makiso bhútsibhútsi bini má kpikili, abhomu-o, ní atsia aze bhú siti 'ngú gba ní-o.

11 Dimandó gba Ebhe-e bini ne bini lulu ndu 'kpí hana ngubula namene kulu gba e-o. Aní ngaha piko piko koli ngua omakiso bini. La-a, omakiso ango-o tí da na'e osisiti 'ngú belegu de bini. 12 Engú bini, Kilisito aha koli makiso bini má kpikili ngú osisiti 'ngú gba okpála duduma ne duduma. Pipita-a, aní atsia anu adu lí pá 'kpa na kokpa gba Ebhe. 13 Mbia inde-e, aní ngadjeke me Ebhe 'o obhulu yala gba ni-e dabili na sa 'dhu ni. 14 Abhomu-o, ne koli makiso bini inde aní aha e, aní adji okpála inde aní avulu o bhú siti 'ngú-o me, u kolo bubu kala Ebhe ngubula duduma ne duduma.

15 Bu Bhobua la bhadi ngapapa pí ya moko, aní apa ngaíza lie me:

16 «Yi tsia nga gandja inde ma akódho e ne uo pita oekpí
 bhomu-o,
 Ngámá apa mo-o.
 Ma ayé olíli gba ma-a lí bua uo,
 ma tsia tó olíli ango-o bhú imbilangu gba uo-o. †»

† 10:7 10:5-7 Tsia bhú Ets. 40:7-9. † 10:16 10:16 Tsia bhú Djlm. 31:33.

¹⁷ Pipita-a, aní atsia apa matá me: «Ma abhúndja matá opupulu 'ngú di ne osisiti 'ngú gba uo-o de.†» ¹⁸ La-a, i du me Ebhe nde ambu li siti 'ngú ambu-o, gumu naha makiso matá ngú na'e'e ade.

Ní a'ó ká nabhuka gba ní-e de

¹⁹ Kaka-a, ondaise ma, ní ambila ndjindji me ní alí li bili na bubu naali-e kabula ngute Yesu inde atuko-o.

²⁰ Aní abhulu kpadji na mbia pi ní, inde di na mukobho li pápá na kpadji na 'ngbé pála bongo na 'ngbé 'ti Ebhe gba omaYuda, akunda napa me, bhú kute e makpe. ²¹ A ka ní ne 'ngbé dimandø inde ngatsia 'kpí li eti gba Ebhe-o. ²² Kaka-a, ní dyudyo liní de Ebhe ne bua ní bini di ne nabhuka hana. Padhá de, anga osisiti bua nakpokpo ku 'ngú adji lie akolo bubu kala Ebhe, kute ní atsia avulu lie bhú engu inde li siti 'he nde bhú e ade. Ndu 'ngú bhomu-o hana amene lie bhú ngute Yesu.

²³ Ní lila engú inde ní nga'o 'to ní 'to e, inde ní nde ngakpokpo e kpekpeke-o. Padhá de, anga Ebhe améne engú inde aní apa me ni améne e mamene. ²⁴ Ní tsia 'kpí liní sunda ní ngú nadu ne mukunda na kukulu di ne namene obabadha kulu. ²⁵ Ní a'ó ka dadjua gba ni-e de maka li okpála koko ambila lio lie ne namemene-o. A ayo mangbo me ní to masi bhú ní sunda ní. Padhá de, anga yi ngau me ekpí gba Ngámá-a akolo bha ndju masikpe.

²⁶ Padhá de, anga pita nambila kukulu 'ngú-o, i du me ní nde ngamene siti 'ngú bhú gandji-e, makiso inde u ti da naha e ngubula na'e osisiti 'ngú-o matá ade. ²⁷ Engú bini, ehe inde atigala pi ní-e, a ko bha nadjekpe ne tsulu hana nakodho 'ngú gba Ebhe di ne dingidhi djua inde atsúlu obhulu yala gba aní-o. ²⁸ Ndu okpála hana inde

† 10:17 10:17 Tsia bhú Djlm. 31:34.

adu agumu líli gba Moidje-e, u adu abhili uo. U du nadje ndjinga uo de, i du me okpála bhisi, i du di-e okpála bata nde apa me a ko kukulu 'ngú-o. ²⁹ La-a, kpála bhende ngau Ndili gba Ebhe-e bhú djila e padhá-a, aní asía ke 'ngú inde ane la matá mane. A mo-o adi? Padhá de, anga kpála ango-o manga ngute na gandja na mbia inde avulu aní bhú siti 'ngú-o de. Aní ngasobho Bu Bhobua inde ngasuno bádha bhú 'bu gba Ebhe-e pí ní-o. ³⁰ A na paká me ní mbila ndjindji me, a ko kpála inde apa me:

«Ma agie siti 'ngú inde u amene e ngama.

Ma ahá pí kpála ne kpála ehe inde

ati ne aní-o. †»

Aní atsia apa di me:

«Ngámá akódho 'ngú gba okpála gba e makodho.†»

³¹ A ko siti 'ngú na kuo kuo ngú nati bhú 'kpa Ebhe na mukobho.

³² Yi bhundja nga engú inde akolo nani lí yi lí nedhinga inde yi asia zì 'kpí gba Ebhe-e lie-o. Bha kolo pipita-a, yi azu likabhu naali. Engú bini, yi alu kpekpeke bhú nagu egú ango-o. ³³ U asobho okpála koko bhú ka yi, u atsia amene uo sisiti kala ndu okpála hana. Engú bini, okpála koko adu bedhe ngú nateteke okpála inde u adu ato mbolo lío bhomu-o. ³⁴ Yi azu likabhu bhú dabili bini ne okpála inde adu bhú tikpu-o. Lí u agbulu ohe gba yi-e lie, yi aziba ne djali hana me u nu nedi. Padhá de, anga yi ambila ndjindji me a ka yi ne tia inde ndjindji naali, inde ngadu daduma ne daduma. ³⁵ Kaka-a, yi adú ne tsulu de. Padhá de, anga yi asía makalá na ngbéngbé kaka. ³⁶ A ayo me yi du ne kekele ngubula namene engú inde lí Ebhe akunda e, di ne nasia ehe inde aní apa me ní

† 10:30 10:30 Tsia bhú Det. 32:35. † 10:30 10:30 Tsia bhú Det. 32:36.

ahá e-o. ³⁷ Padhá de, anga u aye bhú Bhuku gba Ebhe-e me:

«A tigala nedhinga bedi, belegu bedi naali,
li kpála inde a ayo me ani go-o tsia gó.

Ani bhúe de.

³⁸ La-a, kpála inde ngbingbili bhú djila ma-a
tsia sía mukobho na dudu ma kabula nabhuka.
Engú bini, i du me ani nde agie lie ne sidi-e,
bua ma ngá matá ne ani de.†»

³⁹ Nganí-e, ní bhú ká okpála bhende ngagie lio ne sidi,
inde di ngangita-a ade. Engú bini, ní ne okpála bhende
ngabhuka, inde di li kpadji na mukobho-o.

11

Ní le nadu ne ngua nabhuka gba onguo ogbi ní-o

¹ Na'o nabhuka gba o bhú Ebhe-e, a ko naziba me ní
asia ehe inde ní nde nga'o 'to ní 'to e asia. A ko nadu ne
nabhuka me ehe inde ní u e ne djila ní de-e uu. ² Ebhe
aziba nani okpála na kalanu-o ka nabhuka gba o-o.

³ Ka nabhuka-a, ní ambila me Ebhe abho nani doto ne
'li e. Abhomu-o, ohe inde ní ngau e ne djila-a, abho lie li
ohe inde ní u e ne djila de-o.

⁴ Ka nabhuka-a, Abele aha makiso na babadha naali pi
Ebhe, inde ane bhe gba Kaina mane. Ka nabhuka ango-
o, Ebhe au ani bhú djila e ngbingbili. Padhá de, anga
Ebhe ngae makpe aziba makiso gba ani-o. Ka nabhuka gba
Abele-e, ani bha bini ngagama 'ngú, abana ani akpi lie-o.

⁵ Ka nabhuka-a, Enoka kpi nani-i de. Engú bini, Ebhe
aha ani abhúlá. Kpála bini ti da nani nau ani de, anga
Ebhe aha nani ani ngú na'o ani de e. Bhuku gba Ebhe-e
apa me, kala me Ebhe ha ani abhúlá-a, ani amene nani

† 10:38 10:37-38 Tsia bhú Abk. 2:3-4.

engú inde anga li Ebhe. ⁶ La-a, i du me nabhuka nde bhú kpála ade-e, ani ti da namene engú inde anga li Ebhe-e de. Padhá de, anga kpála inde ngadyudyo lie de Ebhe-e, a ayo me ani bhuka me: Ebhe uu, ani la di ngaha makalá pi okpála inde ngagili ani-o.

⁷ Ka nabhuka-a, Nua adje engú inde li Ebhe apa nani e pi ani pindji ongú inde agó, inde u u nga nani e de. Ani au me Ebhe pa eu de, ani atsia abho 'ngbé zabu inde ani akobho piga gba e bhú e-o. Namene ka ani mo-o, ani a'o mangimbo pi 'ndji okpála na pía doto. Ka nabhuka gba ani-e, Ebhe atsia au ani bhú djila e me a ko kpála na ngbingbili.

⁸ Ka nabhuka-a, Abalahama amene líli gba Ebhe li nedhinga inde ani a'i nani ani lie-o. Ani anu bhú doto inde li Ebhe apa nani lie me ni ahá e pi ani, amba akolo naani-o. Ani ayie bhú doto gba e padhá me ani nde mbila de me, ni adji bhú doto bhedho-ie de. ⁹ Ka nabhuka-a, ani anu adu maka gandji kpála bhú doto inde li Ebhe apa nani me ni ahá e pi ani-o. Ani adu nadu bhú 'ti ngbangbali, Isaka ne Yakobho atsia adu di nadu bhú 'ti ngbangbali. A bhomu-o okpála inde li Ebhe apa di nani pi o me ni ahá di doto ango-o pi o-o. ¹⁰ Padhá de, anga Abalahama adu nadjেকে গুধু inde li 'dhu e alu kpekpeke. Ebhe amene lele maka li guđhu ango-o adú lie ngae, ani atsia ayiki bhadi ngae.

¹¹ Ka nabhuka-a, Abalahama asia nani angu ngubula nazu ndili bhú nedhinga ani akolo lie ne kalanga bhelé, belegu li Sala adu lie ne i zu de-o. Ani adu ne nabhuka me engú li Ebhe apa me ni améne e-e, ani améne mamene. ¹² Kaka-a, koli ogbi ní bini Abalahama, inde adu de kuo masikpe-e, azu opiga bhelé. Ongisi inde li opiga ango-o azu o-o bhelé maka ikupala inde abhúlá. Uo bhelé

di maka sike inde lingo 'ngbé 'ngu, inde li kpála ti da natanga e de.

¹³ Ndu okpála bhomu-o hana amu bhú nabhuka me, u nde sia oehe inde li Ebhe apa nani me ni ahá e pi uo-o de. Engú bini, u au oehe ango-o tsutsu, u atsia akpi djali. Abhomu-o, u atsia ambila ma kpulukutu me o ne ogomago, o la di ne okpála na dhuku píla doto ei. ¹⁴ Okpála inde ngapa ngua engú bhomu-o ngasuno mbámbá me o ngagili doto gba o makpe. ¹⁵ I dú me u du nakina doto inde u aze nani bhú e-e, u de agie lio bhú doto ango-o agie. ¹⁶ A na paká me, u adu ne gumu doto inde babadha naali. A akunda napa me doto inde abhúlá ko. Kaka-a, Ebhe ne numu ade me, u 'i ni me ni ne Ebhe gba uo-o. Padhá de, anga ani aleke gudhu bini pi uo.

¹⁷ Ka nabhuka-a, Abalahama aha tsaka maka makiso, li Ebhe ale ani lie-o. Abalahama li Ebhe apa nani me ni ahá 'he pi e-e, adu bedhe ngu naha koli ndili gba e bini-e maka makiso. ¹⁸ Ebhe apa nani pi ani me: «Li kpadji gba tsaka-a, mo osía opiga inde ma apa nani me ma ahá o pi mu-o.†» ¹⁹ Engú bini, Abalahama adu abhundja me Ebhe ne angu nazuku tsaka. Kaka-a, Ebhe atsia agie ndili gba ani-e pi ani maka kpála inde u azuku e me ani nde akpi.

²⁰ Ka nabhuka-a, tsaka atuko bisagu pi ongisi gba e bhisi-o, Yakobho ne Esau, natsia lele ongu inde abháka uo sisi-o.

²¹ Ka nabhuka-a, Yakobho atuko bisagu pi ongisi bhisi gba Djodjefu-o, kala me ani kpi. Ani ateke lie li duku gba e, ani atsia adhøø Ebhe.

²² Ka nabhuka-a, Djodjefu apa li ani akolo lie masikpe de nakpi ka e me, omatsalaele azé bhú Edjipeto maze. Ani atsia asuno engú inde a ayo me u mene e ne biki ni-o.

† 11:18 11:18 Tsia bhú Dje. 21:12.

²³ Ka nabhuka-a, li u azu Moidje lie, okpála inde azu ani-e awo ndje ani ngubula epe bata. U au nani me ani babadha naali, u tsia dje tsulu ka líli gba 'ngbé ngámá-a de.

²⁴ Ka nabhuka-a, li Moidje abhele lie-e, ani ayala me okpála 'i ni me ndili gba ndili na 00 gba Falao. ²⁵ Ani aziba nazu likabhu bhú dabili bini ne piga gba Ebhe-o. Ani atsia ayala nakpi djali inde ngubula nedhinga bedi-e bhú siti 'ngú. ²⁶ Padhá de, anga ani adu abhundja me li kpála zu likabhu kabula Masiya-a , bhobhomu-o pi ani ne tia na ngbéngbé ane bhende na Edjipeto mane. Kaka-a, ani a'o nani djila e li makalá inde ani asía e bhú oekpi inde ngago-o.

²⁷ Ka nabhuka-a, Moidje ayie nani bhú Edjipeto me ani nde kpe ke 'ngú gba 'ngbé ngámá-a de. Ani atsia alu kpekpeke mugito me ani ngau Ebhe inde u uu e de-o.

²⁸ Ka nabhuka-a, Moidje aha nani líli me u leke anokomia na Pasika . Ani atsia aha líli me u pulu ngute li obh0 bhoti, amba andjelu na kuo abhíli ongisi na kalanu gba omatsalaele de.

²⁹ Ka nabhuka-a, omatsalaele agulu nani 'ngbé 'ngu na Mbembe-e mugito me u ngadholo pi doto inde a'ulu má kekele! Engú bini, li omaEdjipeto ale di lie me ogulu 'ngu-o maka uo-o, engu-o atsia abuka uo. ³⁰ Ka nabhuka gba omatsalaele, aga inde asa nani gudhu na Djeliko-o agumu pita nadjí ngongo ngubula 'kpi mananika. ³¹ Ka nabhuka-a, Lahaba, 00 na zabhe-e akobho nani. Ani kpi bhú dabili bini ne okpála inde adu agu Ebhe-e de. Padhá de, anga ani asia nani omatsalaele, inde u atima nani o ngú natsia lele gudhu-o ne guo 'ngú .

³² Ma ti da napa matá pi? Nedhinga ka ma ade ngú nakpokpo 'ngú gba Djedeo, gba Balaka, gba Samisona, gba

Djefete, gba Davidi, gba Samuēle, di ne bhe gba opolofeta-o. ³³ Ka nabhuka-a, u agboko ongbengbe ongámási na okuti bhelé bhú 'gú. U amene ongu inde adu ngbingbili, u asia 'he inde li Ebhe apa nani me ni ahá e pi uo-o, u atsia agbite 'bhø okingbi. ³⁴ U abulu odjua inde adu nade má ka ka ka! U akobho bhú nakpi sakpa mbotia. U adu bhubhuku, la-a, u atsia akolo kpekpeke. U adu kpekpeke bhú egú, u atsia aha angu osudha na gandji gandji. ³⁵ Ka nabhuka-a, olisi au matá okpála gba o inde amu-o. Padhá de, anga okpála ango-o azuku.

U ato mbolo li okoko nakolo masikpe de nakpi. U ayala me u gbegbe o sakpa okpála adu ato mbolo li o-o. U amene mo-o ngubula me o zuku ngu nasia mukobho na ndjindji naali. ³⁶ U amu okoko, u atsia abhi di uo ne fimbo. U agbigbite okoko ne gbindjili, u atsia amba di uo bhú tikpu. ³⁷ U abhili okoko ne teme. U akokodho bhusu okoko bhisi ne sii. U atsia abhili okoko ne mbotia. Okoko adu anu ne ndu bili hana me u nde ato ko kandø, i du di-e ko meme. U adu obhulu ndibhili. U adu nato mbolo li uo, u atsia adu namene uo kpekpeke. ³⁸ U ti nani da nadu píla doto inde-e de. U adu nadjakadha abhú 'gu, di ne apí oeta. U adu nadu bhú oedú di ne bhú ogudho teme.

³⁹ Ebhe aziba nani ndu okpála bhomu-o hana ka nabhuka gba o-o. La-a, u sia ehe inde li Ebhe apa nani me ni ahá e pi u-o de. ⁴⁰ Padhá de, anga Ebhe aleke nani ehe na babadha naali pi ní. Ani kunda nani de me u kolo ndjindji hana mandí ní-e de.

12

Yi lu kpekpeke bhú olikabhu inde yi ngazu e-o

¹ Pi ní-e, ndu ndindi okpála bhomu-o hana inde abhuka nani Ebhe-e, asa denko ní ngbalina u ngau 'ngú

inde ní ngamene e ne djila o. Kaka-a, ní gbe liní li ongú bhende ngagbigbite ní me ní adhúku ndjindji de-e magbe. A ane la mane pi siti 'ngú bhende ní ngali bhú e má gala gala-o! Holo inde li Ebhe apa me ní gu e-e, ní gu akólo makolo ali soso. ² Ní banga djila ní li Yesu inde li nabhuka gba ní-e alu pi e, nayie li lilita akólo makolo ali soso-o. Aní aziba nakpi li kulusi. Nakpi li kulusi-e, a ko nakpi na numu. Engú bini, aní dje numu tété de. Padhá de, anga aní adu nau djali inde aní asía e-o. Mbia inde-e, aní adu li pá 'kpa na kokpa denko kiti na ngámá gba Ebhe-o.

³ Yi bhundja nga Yesu maka aní akibila yala inde li okpála namene siti 'ngú-o adu nayala aní ne e-o. Kaka-a, yi a'ó de me ndala ha angu yi-e de. ⁴ Padhá de, anga bhú gbele inde yi ngagu e ne siti 'ngú-o, yi gu nga nakolo bhú nakpi ka yi-e de. ⁵ 'To yi a'ili li líli inde li Ebhe aha e pi yi maka ongisi gba e-e a'ili? Líli angu-o me:

«Ndia ma, i du me Ngámá nde ngali mu-o,
mo obóyo de.

i du me aní nde ngambembe bhú 'ndji mu-o,
bua mu abí la di ndala de.

⁶ Padhá de, anga Ngámá ngali
kpála inde aní akunda e-o.

Aní ngabhi kpála inde aní ambila
me a ko ndili gba ni-o.†»

⁷ Kaka-a, yi kibila okpekpeke da 'ngú inde li Ebhe ngali yi ne e-o. Aní ngamene yi maka ongisi gba e. A ko ndili bhedho li 'dyi e líli e de-e? ⁸ i du me Ebhe nde li yi maka ndu ongisi koko gba e hana de-e, a akunda napa me yi ne kuku ongisi gba aní-e ade. Yi ne ongisi inde u mbila 'dyi o de. ⁹ A li ní píla doto inde-e ne odyidyi. U adu

† 12:6 12:5-6 Tsia bhú Gbt. 3:11-12.

nani nali ní. Ní atsia adu di namanga uo. A ane la matá mane me ní manga 'Dyi ní inde abhúlá, ngubula me ní sia mukobho. ¹⁰ Odyi ní adu nali ní ngubula nedhinga bedi, maka u adu abhubhundja lie-o. Engú bini, Ebhe ngali ní ngubula bádha 'ngú gba ní-o. Aní akunda me ní du bubu maka ni. ¹¹ Nedhinga u ngali ní lie mbia inde-e, a ngau lie maka u de ngaha pi ní likabhu, a ha djali pi ní de. La-a, pipita-a, okpála inde akodho 'kpí li ngua kpadji bhomu-o ngasia nguwa na guo 'ngú inde akpøtsø lie ne mukobho na ngbingbili-o.

¹² Kaka-a, yi 'e 'kpa yi inde andala-a ne bhúlá. Yi mene la di me 'dhu yi inde andala-a, a kolo kpekpeke! ¹³ Yi dhuku li okpadji inde ngbingbili, amba 'dhu kpála bhende ndjindji ade-e agumu de. Aní kobho mangbo makobho.†

Yi du nagbo 'dje yi ndu 'kpí hana li Ebhe

¹⁴ Yi gili nadu ne guo 'ngú ne ndu okpála hana. Yi du la di bubu. Padhá de, anga li kpála du bubu de-e, aní ú Ngámá de. ¹⁵ Yi lila liyi me kpála bini ayie sa bádha bhú 'bu gba Ebhe-e de. Kpála bini akólo la di bhú ká yi maka ndula inde susu-o de. Ndula ango-o akø lie, a asiti mukobho gba okpála bhelé ne songø inde bhúbhú-o. ¹⁶ Kpála bini bhú ká yi adú nakunda olisi, i du di-e obhosi ngangá de. Kpála bini bhú ká yi aú oehe gba Ebhe-e bhú djila e padhá de, maka Esau. Aní atsjindji nani nadu ka e ndili na kalanu ngubula koli sani 'zu bini. ¹⁷ Yi ambila ndjindji me sidi-e, aní adu ne gumu me 'dyi ni tuko bisagu pí ni. Engú bini, 'dyi aní abebe aní. Padhá de, anga abana nani aní ale nadji engú inde aní amene e lie ne naku 'gbá-a, aní sia kpadji de.

† 12:13 12:13 Tsia bhú Iša. 35:3; di ne bhú Gbt. 4:26.

Nau inde i ti da nadyiki de

¹⁸ Yi kolo nga denngo eta bini de inde u ti da nabu 'kpa lie maka eta na Sinai, inde adu nani ne dingidhi djua-o. A adu ne biti, di ne anvi na kpekpeke naali. ¹⁹ Eta ango-o adu di ne tolo toti, di ne tolo nagama 'ngú. Li omatsalaele adje eli bhomu-o lie, u ayo me Ebhe agáma matá engú koko pí bhobhomu-o de. ²⁰ U ti nani da nakibila líli inde-de. Líli ango-o me: «Kpála inde abú 'kpa e li kute eta-a, abana i du di-e enu-o, u abhólé aní ne teme.†» ²¹ Engú inde u adu nau e adu na tsulu tsulu. Belegu Moidje atsia apa kaka me: «Ma ngadje tsulu naali, ma la di ngaguku maguku.†»

²² Engú bini, yi akolo denngo eta na Siona, denngo gudhu gba Ebhe na mukobho-o. A ko Yelusalema na abhúlá bhú dabili bini ne oandjelu gba e inde kóté ne kóté apo bhúla o bhú anokomia-o. ²³ Yi akolo denngo ongisi na gigina inde apo bhúla o, inde u aye 'li o abhúlá-o. Yi akolo denngo Ebhe, kpála nakodho 'ngú gba ndu okpála hana-o. Yi akolo denngo okpála inde ngbingbili, li Ebhe amene me u kolo ndjindji hana kala ní-o. ²⁴ Yi akolo denngo Yesu, kpála inde ne ludu sunda ní ne Ebhe bhú gandja na mbia inde li Ebhe akodho e ne ní-o. Yi akolo denngo ngute aní inde atuko, inde ngaha bádha 'ngú pí ní inde ane bhe gba Abele mane-o.

²⁵ Yi lila liyi! Yi ayála nadge kpála inde ngagama 'ngú pí yi-e de. Padhá de, anga okpála inde ayala nani nadge kpála inde adu naha líli pí o píla doto-o, neke nasia ke 'ngú de. A adú bhadi pí ní moko. A ne la matá mane, i du me ní nde ayala nadge kpála inde ngagama 'ngú pí ní nayie abhúlá-o. ²⁶ 'Li aní adyiki nani doto. Engú bini,

† 12:20 12:20 Tsia bhú Eki. 19:12, 13. † 12:21 12:21 Tsia bhú Det. 9:19.

mbia inde-e, ani apa pi ní me: «Ma adyíki matá doto bhútsibhútsi bini. A dú bha bini doto de, ma adyíki di ne abhúlá hana.†» ²⁷ Eli inde me «matá bhútsibhútsi bini», akunda napa me oehe inde u abho e mabho-o adyíki, i tsia ngíta, amba ehe bhende i ti da nadyiki de-e tígala bha ngae.

²⁸ Ní ngasia nau inde i ti da nadyiki de. Kaka-a, a ayo me ní gie heni pi Ebhe. Ní mene la di pi ani kulu inde anga li ani ne tsulu hana di ne namanga ani. ²⁹ Padhá de, anga Ebhe gba ní-e, a ko djua inde ngade made.†

13

Yi mene engú inde nganga li Ebhe

¹ Mukunda inde sunda yi-e nu bha ne kalanu maka ondaise . ² To yi a'ili nasia ogomago de. Padhá de, anga bhú namene mo-o, okpála koko asia nani oandjelu me u nde mbila de. ³ Yi bhundja okpála bhende bhú tikpu-o mugito me, yi ne uo bhú tikpu bhú dabili bini. Yi bhundja okpála bhende u ngato mbolo lio-o, mugito me u ngato mbolo ango-o li yi.

⁴ A ayo me ndu okpála hana manga kuva mamanga. A ayo me bhoko lila kute e pi wala e, amba olo lila di kute e pi 'ko e. Padhá de, anga Ebhe akódho 'ngú gba okpála inde ngakunda olisi, i du di-e obhosi ngangá-a makodho. Ani akódho di engú gba okpála inde ngakunda olisi di ne obhosi ngangá, a la di-e okpála inde ngakunda olisi, i du di-e obhosi koko.

⁵ Gumu tia ahá ngu yi bhú mukobho gba yi-e de. Yi kpi djali li ehe bhende ka yi-o. Padhá de, anga Ebhe apa me:
«Ma 'ó ka mu de,

† 12:26 12:26 Tsia bhú Adj. 2:6. † 12:29 12:29 Tsia bhú Det. 4:24.

ma bála 'kpa li mu
belegu de bini.†»

⁶ Kaka-a, ní ti da napa ne nabhuka hana me:

«Ngámá ne kpála inde ngateteke ma,

ma djé tsulu li 'ngú bini de.

Okpála ti da namene ngú ma

mangua 'ngú dho?†»

⁷ Yi bhundja nga okpála inde adu nani pí 'ndji yi kalanu-o, inde akpokpo eli gba Ebhe-e pi yi-o. Yi bhundja nga lele maka u akpata nani Ebhe lie, di ne maka u amu lie-o. Yi bhuka maka u abhuka nani lie ko. ⁸ Yesu Kilisito yiyipa de, lili, naki, duduma ne duduma. ⁹ Yi a'ó de me nasuno na gandji gandji 'e yi li kpadji-e de. A ndjindji me bua ní sia angu ka bádha bhú 'bu gba Ebhe, a alú pí olíli inde atsia ezu-o de. Padhá de, anga okpála bhende ngamene ngua olíli bhomu-o sía bádha 'ngú tété belegu de bini.

¹⁰ Odimandø gba Ebhe inde ngamene kulu bhú 'ti ngbangbali-e ti nani da nazu enu inde u atsutsulu e pí misa gba ní natsulu enu-o * de. ¹¹ 'Ngbé dimandø gba Ebhe nganu ne ngute onu li bili na bubu naali, ngubula nahaha maka makiso ngú na'e siti 'ngú. Engú bini, u tsutsulu kuo onu angu-o li ngongo, a adudu bhú ká okpála de. ¹² Kaka-a, Yesu akpi di lingo gudhu na Yelusalema ngubula na'e siti 'ngú gba okpála ne ngute e makpe. ¹³ A ayo me ní nu kø liní ne ani ali ngongo, ní kibila ngua pádha inde u apadha ani ne e-o. ¹⁴ Padhá de, anga píla doto ei-e, gudhu inde ní ngadu bhú e duduma ne duduma ade. Engú bini, ní mangbo ngagili gudhu

† 13:5 13:5 Tsiabhú Det. 31:6, 8. † 13:6 13:6 Tsiabhú Ets. 118:6.

* 13:10 13:10 Enu inde u atsulu e pí misa si-e, a ko makiso inde u apa 'ngú e bhú olukuluku 15-16.

inde adú galikpe ko. ¹⁵ La li kpadji gba Yesu-o, ní dhөгө Ebhe ndu nedhinga hana maka makiso, a akunda napa me, ní dhөгө 'li ani ne 'bhө ní. ¹⁶ 'To yi a'ili li namene bádha 'ngú, di ne nateteke liyi sunda yi de. Padhá de, anga ngua makiso bhomu-o nganga li Ebhe ngae.

¹⁷ Yi manga okpála inde pí 'ndji yi-e mamanga. Yi mene la di líli gba uo-o. Padhá de, anga u ngatsia 'kpí li yi ndu nedhinga hana ne nambila ndjindji me ekpí bini, o kpókpo kú kulu inde o amene e kala Ebhe. Yi 'o me u mene kulu gba o-o ne djali hana. U améne ne nalopolo lio de, anga u mene ne nalopolo lio-o, bhobhomu-o téteke yi de.

¹⁸ Yi yo Ebhe pí ya. Ya ambila me bua nakpokpo kú 'ngú gba ya-a ndjindji. Padhá de, anga ya ngagili ndu 'kpí hana namene engú inde li lelele. ¹⁹ Ma ngayo ka yi ne kekele me yi yo Ebhe ngú ma, amba ani bhulu kpadji me ma gie lima de yi má gala!

²⁰ Ebhe inde li guo 'ngú ngayie ka e,
 azuku Ngámá gba ní Yesu bhú ká okpála inde amu-o.
 Ani akolo 'ngbé mulila gba okandөө ne ngute e
 i nde ani aha e maka makiso.
 Ani amene me gandja na duduma-a lu pí ngute
 ango-o.

²¹ A ayo me Ebhe ango-o mene me yi kolo ne angu
 ngú namene 'ngú
 inde ndjindji ngubula namene mukunda gba ani-o.
 A ayo me Ebhe 'o bhú ní engú inde ndjindji kala e
 li pápá gba Yesu Kilisito.

A ayo me u dhөгө ani duduma ne duduma.
 A adu moko!

Engú na soso

²² Ondaise ma, ma ngayo ka yi me yi dje eli inde ma ngato masi bhú yi ne e bhomu-o ne 'ndjá bua. La di-e,

balu ma aye e pi yi inde-e ndjándjá ade. ²³ Ma akunda napa pi yi me u atse 'kpa li ndai ní Timoté atse. I du me ani nde akolo má gala-a, ya anu natsia yi bhú dabili bini ne ani.

²⁴ Yi yi ndu okpála hana inde pí 'ndji yi-e mayi. Yi yi la di ndu okpála gba Ebhe-e hana mayi. Ondaise ní na Itali yi yi mayi. ²⁵ A ayo me bádha bhú 'bu gba Ebhe-e du bhú dabili bini ne ndu yi hana.

Gandja na Mbia

Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 25 Mar 2022

6b4904fb-f8ce-5931-8218-7cee8914232c